

四庫全書

集部

欽定四庫全書

林蕙堂全集卷十一

湖州府知府吳綺撰

露布

擬浙江大兵平大蘭山土寇舟山逆賊捷報露布

臣聞玉弩垂芒九地失負嵎之險瑤堦舞戚四瀛銷吐霧之妖  
日月所臨有容光而必照雷霆下擊無負固而不靡干戈揚  
天子之威鐘鼓送

金匱要略卷之十一  
卷十一  
聖人之喜恭惟

皇帝陛下天挺英姿神授偉畧玄雲入戶奉寶籙於丹陵綠  
錯昇壇得瑤圖於翠渚榮露下竹葦之澤薄桂海以敷文肅  
雲垂芝草之華罄冰天而服武塗山禹會已集萬國之珙  
球蒲版堯衢自靜九重之尊俎蠡茲浙寇敢悖天常肆虐  
金莪輒奮九頭之暴舒凶赤堇久稽一面之誅始猶釁構  
魚書遁蒼崖而伏莽終則怒迴螳臂依碧嶂而憑叢踪幾  
類於黃巾蔓欲同乎綠線魚之鱉背爲帆通孫恩於虜

瀆鼇身弄楫連楊泰於鼎湖出沒蛟門憑陵虎巘山倚  
海接相為犄角之形水借陸援用逞連拳之勢遂使曹  
娥江上估客盡棄桃枝嚴子岳中隱士難安桂樹屐殊康  
樂寧煩孟顛之疑戈挺盧循屢致王凝之變臣等敢承  
廟筭廣布

皇靈方傳壘而呼冀追揚旗之罪乃揮弋而舞仍矜拒轍之能  
犬既敢於吠仁虎愈威於服猛遂乃應變出奇潛師制勝躡懸  
車之嶺暗搗腹心陟東馬之巖平分牙爪氣衝南斗輝煌雙

劔之芒影滅西郊變幻五雲之陣始于夏關之地殲厥亮鋒繼  
于斗門之區躡其堅壁焚骸積阜幾成京觀之風殘息登高更  
切守陴之哭爰于某日遂破大蘭山土寇某者羊頭巨鏃并  
穿袁尚之顛龍尾神鏢爭斷蚩尤之背血被原而成赭何言鷹  
宕千尋屍伏地而流丹遂滿山陰萬壑而逆賊某等或以干  
城舊將為背地之陳旆或以島嶼遊魂作圖危之道覆猶爾  
遷延重地窺伺巖疆臣等益奮天聲嚴伸大討秉屏翳之  
效靈值馮夷之助順樓船萬艘還興黃海之師戈甲千重共合

昆明之戰鯨波夜湧笑鼉令之浮屍蜃氣朝昏繫呂嘉  
而授首兔方迷于入穴鳥乃歎於焚巢惟此舟山者去  
浙水纔有兩潮藏沃野寧惟千頃咽喉吳越煩廟慮者  
十年襟帶閩番結隱憂者數省獲茲全勝遂據要衝凡  
皆遙稟乎神謀故致奏功於師武資其甲仗不煩武庫  
之兵藉彼餽糧可上金城之策斷上流之奔逸勢若建  
瓴作東越之屏藩雄如列嶂遠人歸化皆言水不揚波  
樵客迎仙益見山無匿影矣臣等無任懼忤踴躍之至

謹奉露布以聞

疏

霞霧山北菴募緣疏

五丁開嶂罕覩神工三癸建亭爰稱勝跡惟此菴城之外多古道場憶彼雲水之旁為舊遊地嘗愛山名霞霧厥稱境足雲煙向逢石屋老人久幸秋園白象非遇燒庵婆子俄驚夜舞紺龍火種蓮花信因緣之有在天開祇樹知事業之攸存茲有隱愚上人者座列三支燈然

五葉軒轅峯頂曾提頑楫之真傳妙喜巖前擬續皎然  
之故跡但高坐不為漢語而上行未易唐捐是以抽毫  
代豐干而饒舌俾之托鉢乞給孤以蓋頭倘童子聚沙  
共種旃檀之樹則山神獻木即成蒼蘆之林識嶺路之  
高低不碍吟成瞋睡儘人間之興廢還聞福在檀波矣  
為徹干上人結茅疏

蓋聞勝緣有待嗅水知香法會將開移泉作供雖地經  
桑下不成三宿之情而坐湧花中實現六通之果惟茲



徹千上人者系出吾宗法登彼岸生龜早脫嘗稱白足  
名流靈鷲恒叅不數黃頭小乘一瓶一鉢徒聞粥飯之  
緣千水千山莫問袈裟之地將參禪而少壁此面奚堪  
欲聚石以無臺誰頭可點何方蘭若能容獅子之牀此  
日竹林不聽鸚哥之語是以持杯不渡振錫空吟師惟  
得得而來室且搖搖靡定必藉聚沙之神力乃非築舍  
之虛言貫似蚨飛錢聊分於于頓珠同鶴報金共布於  
給孤買沃洲之山燈留黃蘗開廬峰之社池有白蓮矣

為默雷上人募古琴疏

神僧洗鉢但乞伊蒲長者布金惟資祇樹苟非悟超寶  
筏將得意而忘言何以供設銀絲乃聞聲而說法惟我  
默雷上人法傳五葉道契三支短簿祠邊長攜焦尾生  
公石畔還欲點頭言募名流用求古器掃一切有為之  
法別作檀波用十分無累之神孤尋果地作水仙操煙  
波何處移情得混沌材風雪還堪悟道非絃非指直須  
言下儋承在水在山莫令當前錯過我慙坡叟曾得交

聽誰是韓公應來聽潁倘令心游軫外頻教擊磬敲冰  
不妨塵冷匣中依舊山空月老

募修溪南會館法華菴疏

蓋惟河山西極一花開白象之天煙雨南朝雙樹栖赤  
烏之地考報恩之為古剎前代爰崇而法華之有精藍  
吾家特建旃檀馥郁在長干勝選之區瓜瓞綿長是豐  
芑發祥之所三百年替纓赫奕堂構常新十八派冠蓋  
往來絃歌不輟故九秋鶚薦賓興有賴以雲蒸而千里

鴻飛客至無憂于露處允矣名宗之美制皇哉上國之  
雄圖然地屬梵宮守護必資于釋子迨事經軍帑倥傯  
不戒夫祝融遂使勢烈燎原悲興巢幕青氈靡託何言  
蒼藟之園畫棟難存竟作荆榛之苑斯則旅人為之裹  
足過客見而傷心者矣予以去秋來經舊館疏棠老桂  
惆悵於四十年前忍草悲花感慨於五百劫後念祖宗  
勤勞不憚殊切謨謀倘子孫修復無聞有乖仁孝欲為  
運錫笑乏倒囊幸賴非止以同心尚願諸公之合力祇

園長者倘能量地以布金梵域神童何碍聚沙以壘塔  
况乎振上世中衰之業名較善于他工貽後人即次之  
謀報非賒于異日物力歸之一手事必可成功德及于  
衆身福均無量

衡山南嶽廟募建斗母閣疏

地莫盛於南而衡當星紀神必尊乎北而斗作天樞慨  
自變起鳴狐冤血橫流于赤社迨及亂生鬻虎妖氛釀  
毒于朱陵林木之禍方深荆棘之悲已甚維迅掃于十

一載丕揚允賴天威而消劫于五百年默運尤資神力  
此斗母寶閣創建之所由來而衡嶽羽人奔走為之勸  
募也夫弘開一炁密孕九皇演尼丘化玉之符而王稱  
孝弟說耆閣布金之法而主制兵戈西鬼東烏自轉兩  
儀之轂左龍右虎獨持七曜之衡用神光而大靖邪氛  
以生氣而潛弭殺運丹靈峙為長離之鎮摩利支開普  
化之祥道自無殊地應有合矣但不聞雞犬徒傳仙好  
樓居而遙集龍鸞那見神能露處不遇聚沙之童子絳

闕何得九重倘逢助木之山神丹臺即成百丈惟衆仁  
人挽回氣數立開金錯之囊則大慈母稅駕河魁坐湧  
翠瓔之館蒼龍度厄銷水火以駢禎赤焜垂光照乾坤  
而保泰德無不應福有攸歸

募建巽閣專祠繆李二先生疏

蓋聞忠義之挺生良闕國運文章之蔚發猶藉地靈故  
一水稱丁用兆衣冠之識而二山名酉聿開圖史之祥  
維此延陵適當斗野境稱靈秀舊為君子之風俗尚清

剛素秉正人之氣乃坤維實為盤固而巽位尚未崇高  
何以為向學之心且難副右文之化陰陽是卜取堪輿  
家言風木相資補離震間事上圖傑閣奉開化翊運之  
神下敞高堂列文貞忠毅之主蓋以首嬰黨禍雖百折  
而不辭并能力挽王綱致九死而靡悔齒牙盡脫猶聞  
攀檻之聲支體無存但有清衣之血倘無顯祀曷以激  
勵乎忠貞得此崇祠始足用存乎模楷况郡大夫主持  
風教已有意于崇賢豈諸君子表率鄉閭乃忘情于助



義特為饒舌徧懇同心共謀不日之功長迂無疆之秀  
將見嵯峨畫棟摩日月而對雙峯聳峙雕甍挹雲霞而  
凌萬井英賢鵲起寧殊獬豸之山科第蟬聯即在鳳凰  
之嶺矣

為藏山和尚募塔疏

藏山和尚白足清姿赤髭異品十年面壁曾窺立雪之  
傳五夜入門得悟拈花之旨偶然著手妙墨無讓于貴  
休率爾搖頭新篇竟同于覺範虎溪大笑惟共三人鷲

嶺孤行獨留一指臘才高于週甲道忽阻于建寅看九  
日之黃花猶存我相訪三生之白石欲待他年隻履空  
歸去來無著寸絲不挂究竟如何嗣子乳乳盼金棺而  
何有僧雛子子問鐵鉢以無存匪藉大檀誰封廣柳于  
是不辭饒舌覓一袈裟但得共為發心藏諸舍利上兜  
率界信高人畢竟生天歸宰堵波非長者那能得地即  
交情以完禪智用厚道而結勝因行將雙樹參差長開  
淨域且見千花環繞更禮寒山

慈渡菴募殿小疏

赤岸分流山高五嶺白沙湧浪渡險三潭鼓莫奏于回  
颿舟易同于覆釜迺有給孤善士義拯迷津幸得知本  
禪師身登道岸花龕夜誦空驚怒浪橫飛蓮筏朝浮不  
畏業風吹墮伍胥請客直教喚醒醉人河伯娶妻肯令  
沉如浣女多生援手已註籍於東華一把蓋頭尚浮杯  
于西竺林中風雨蜂王臺何處傳燈江上波濤獅子座  
誰來問法乃屬豐干而饒舌用禪龐蘊以發心江類獮

猴弘啟赤華之社人如龍象還開紫柏之堂將成塔必  
始乎聚沙豈種禾乃幾于生豆語應不妄福有所歸

募脩香界菴疏

錫山攬勝古有草菴金地從新茲名香界蓋清江刺史  
親荷鍤以誅茅而蒼雪大師自浮杯而證果者也塔升  
秀嶂久歷經行塢出吉雲恒多栖息冠九龍而直上獨  
高龍樹之風凌一鷲于孤騫是為鷲峰之境豈意纖埃  
之忽入幾遭大劫之全灰茲幸梁汾居士偶返故山念

彼楞伽山人實為好友解驂贖客脫才子於流離置驛  
延賓以名流為性命負信陵之意氣而自隱于醇酒美  
人有叔原之詞章而更妙于舞樓歌扇昔經斯地願把  
臂以入林遙指茲峯可同心而藉卉何其半生遺世曾  
不染于微塵遂爾一笑凌雲竟永辭于幽壤偶因殘墨  
爰展遺型聽橫笛于斜陽心傷向秀奏鳴絃于流水夢  
斷鍾期將留幻影於空堂用表知音於來禊乃有晉陵  
之仙尹見義勇為更得申浦之賢侯聞聲助善共捐廉

吏之俸用表親仁無全良友之情尤堪化俗但義舉何  
容獨任而勝事必賴衆擎用告同心共為協力山神運  
木便成七寶之臺童子聚沙即是千花之塔檀施勿悞  
茨福攸歸

為熊邑侯建書院疏

廣陵實為重地江邑更屬要區當水陸之衝輪蹄交錯  
值疲敝之後呼應艱難况叵測之人情陰陽莫辨且吹  
求之吏牘左右安支是以一日難居肩荷者視如傳舍

千夫莫措銓主者指為畏途時則旄鉞重臣皆栽棠之  
名伯至于檐帷循吏有拔薤之龐公尤幸真儒來為仙  
尹如邑侯熊公龍山碩望鶴澤英流射策以揆日名高  
莅官而戴星績懋獄不苛而市不擾吏治咸澤以文章  
子言孝而弟言恭聽斷恒先之教化清矣不為沽激故  
其清常湛水壺明也不事矯虔故其明有同水鏡機務  
無嫌于旁午剖決如流簿書不混于刁丁毫釐必察革  
火耗之羨入而潤不染于脂膏罷差役之追呼而怒不

聞于需索嚴莠民之罰而白望潛踪絕囂訟之風而蒼  
生樂業脩義學于四境化美文公翁講

聖諭之六條功同卓茂是以徵催孔亟閭閻無困苦之嗟車馬雖  
煩井里有豫遊之慶一錢不選咸知暮夜難干五袴長聞返  
覺陽春不逮人真如父縱是怒而皆慈姓可名兒但有  
恩而無怨德難縷悉聊以玄黃為公子之裘功匪筆書  
惟願清白留後人之法原因善政而更懷善教之思誠  
以仁聞而更冀仁言之益况乃堂依楊柳歐陽之舊宅



猶存則有嶺號梅花何遜之清風未遠特為講院共迂  
文軒俾月吉而常臨時聞讀法庶風規之長見獲遂瞻  
依但受澤多同而庀材殊急既衆擎之易舉共效子來  
將合力以圖成而永敦民俗矣

募建西來閣疏

蓋惟金山獨峙砥萬頃之銀濤寶塔雙懸鎮千尋之貝  
闕是以龍軒遙駐宸章燦日月之輝犀管親題睿藻壯  
江山之氣則蘇子瞻之留帶未足為奇而張承吉之聞

鐘無能稱善者矣然在上方而眺北固有傑閣以號西  
來窻中納千嶺之柔嵐檻外收一江之勝賞昔年締構  
曾因賜紫高僧此日摧頽無復留丹佳境是以斌如開  
士不憚饒舌而效豐干而我小阮庭生亦欲發心而同  
玄度但慳囊未啟誰為助木之山神而妙果將成必賴  
聚沙之童子則丹梯百尺即仰睇乎慈雲而繡拱三重  
便遙觀于法海將見施無不報應知福有所歸矣

為天續上人募菴疏

跨鶴城中何妨飛錫渡牛河畔雅足停車則有天續上人半偈清修三乘妙悟傳五葉之法豎拂子而隨叅作一枝之栖放蒲團而不下布獅子座三千那得容身立蜂王臺些子如何著手雖道人之漢語猶存不了之緣非長者之唐捐難助無邊之果用為饒舌共懇發心似西域之賢妃甘輸柰苑若東方之童子更捨旃林則一把茅得以蓋頭而三更棗可尋歇脚矣

傳

家茂才聲遠先生傳

愚嘗流覽前編遐稽往哲甘公朗鑒得陶謙于綴帛之  
辰桓子英標識安石于撫塵之際未嘗不慨然擊節願  
為執鞭以為知己難逢得人匪易也乃至謝家池草若  
靈運之愛惠連楊氏竹林如凡昱之知遵彥則論交一  
門之內而流聲千載之餘尤其難哉亦云罕矣余憶當  
初歲偶爾遠遊乃家聲遠先生輒相期許號以龍文仍  
為獎成勉其驥足而深知未報徒思腹痛之言篤行難

忘聊紀躬修之跡弗慙鄙製爰闡幽踪先生諱鳳鳴字聲遠安若其別號也少有雋才長多異操甫受書而名傳鄉曲未弱冠而聲振膠庠當世業之中衰難謀二脯值親年之既耄俱在八旬宋處宗之窓前鷄堪入饌王休徵之沼上鯉每就烹遂使垂白含飴雖茹荼而不識將烏戲綵覺啖菽以逾甘迨侍疾有類伯喈累月何曾貼席及持喪實同處默頻年猶自居廬以事死而若事生惟思學孔由孝親而能孝祖還欲報劉五十六年恥

求凰之易節百千萬日守牧犢以終身此皆敦篤天倫  
良可挽回風俗者也是以棘闈屢躡未遂顯揚梓里咸  
瞻共欽孝義豫州刺史為陳紀而表閭河曲諸生就王  
通而列舍至於田間認履笑而不言畦畔鋤金揮之弗  
顧置幼安之器汲者忘爭勸雍伯之糜饑氓待飽義熙  
之後不復五斗為懷正始以還但有一編自適臣言忠  
而子言孝曾無矢口雌黃誦其詩而讀其書更復娛情  
飛白精思八法長畫被以成穿競乞千文輒填門而未

倦每偕友道終朝共賞山泉時約戴逵鎮日惟論書畫  
是以西京耆碩奉仲舉為端人東洛羣賢推彥方為長  
者良有以也豈曰誣哉既而夢兆白雞慨三良之隕露  
身騎黃鶴歎一笑以凌雲運值康熙年當己酉孟秋下  
浣卒于里居子長順長循二君具象賢之德孫翹京翰  
京等輩懷繩武之思而翰京如京猶能飭行立名好文  
服古聚書能讀知王顛之有孫留硯堪傳識范喬之繼  
祖信虞詡得寬和之報而楊竒守清白之遺慶既有源

施方未艾也

豐南內史曰我

國家肇修人紀首重天常禮官時有褒揚史臣亦多  
紀載惟義夫一節渺矣罕聞憶我先大夫稚圭公既失  
太淑人滎陽氏鰥魚廿載遂絕念于雲荼哀鴈三秋竟  
終身于霜蓼與茲伯子並號大儒而一命未膺雙貞  
不顯嗚呼五倫始于夫婦豈可闕然百行俱在詩書  
斯為卓爾不獨緬懷於知我實亦慨想夫古人矣



又道人傳

又道人凌姓名畹字又蕙歙之沙溪人也少負雋才雅懷逸志鶴非鳥伍即傍白雲松不林生恒依丹壑詩如常侍遇得意而旋吟畫擬右丞時解衣而不倦然性惟絕俗心在寡營郭忠恕之戲寫風鳶非徇貴客李至獻之能圖水牯豈贈世家巷內無人曰斯世何堪入眼胸中有竹謂此君猶是知心以是四壁長貧一筇空老雖近三皇之丹竈未厭搜竒乃訪五老于香爐恒思選勝

飛緝翠嶺多康樂之所未經躡履赤城實興公之所曾  
賦晚愛隋橋之月遂至携家久甘范甌之塵因而沒世  
家姪楞香念張堪之遺孤做原陟之厚義斂而喪葬贍  
其女妻益君本高人實多俠槩曾留張儉靡惜破家嘗  
哭李膺無憂及禍茲以交情而獲報詎云天道之無知  
耶

方烈婦仇氏傳

婦姓仇氏歎人方本素之妻也手劍成忠周稱烈士曳

裾起譽漢號碩儒昭代歷有聞人近世齊為編戶婦生  
懷淑德少具令姿從女塾以授書在公宮而習禮史開  
范傳長羞蔡琰之篇詩誦衛風獨愛共姜之賦下早歲  
之玉臺空悲蕩子壓頻年之金線恒為他人慈母為之  
痛心孝女因而屈膝貞能不字誠何怨于標梅死且靡  
他敢有傷于穠李迨德耀之嫁已逾十年及荀采之婚  
曾無三月舞鸞青鏡猶未穩乎雙栖別鶴珠絃遽分飛  
而獨往豈丈夫之志果在桑蓬惟女子之行自甘荼堇

望刀環而無日誰憐機上流黃合釵股以何時不念樓  
前織素無珠可賣供餐成巧婦之炊有土堪包築壠代  
孤兒之泣八年胥浦俄驚鵬鳥之來千里練江特買蜻  
蛉而至青囊不驗已無分于齊眉白刃可揮復奚辭于  
割股嗟天傾而莫補歎海竭以難填淚欲成花即是斷  
腸之草魂能化樹將為連理之枝感姑婦之慰留勸家  
人以環守藥名獨活苦不由人蟲有寄生孤誰似我貧  
同種蒜艱難回廣柳之車事切封榛隱忍滌薦蘋之釜

久無夜哭門前不聽烏啼忽起晨妝窻下翻疑鵲喜鄰  
姑東媪初祗訝其闔扉老父得書早已聞其掛樹粉痕  
在壁終還陰氏之屍錦帶留牀遂宛廬江之頸于是里  
人罷社邑令式間題曰貞婦之祠表以女宗之墓如生  
斑竹在土而已有淚痕或化綵雲帶雨而尚聞香氣猗  
歟烈矣不亦美哉嗟乎綠綺幽情芳年越禮黃花妙句  
晚景貽譏已甘包廝之嫌寧論委禽之巧三年傾國空  
憐息媯之無言五夜失聲偶為江郎而喚覺稍徘徊于

俄頃即隕落其生平茲獨漂搖風雨存定志于經年跋  
涉關山返遺骸于遠道然後從容就盡慷慨完貞斯有  
大過于人豈可無聞于世爰為濡墨以待書彤用箴頑  
懦之風并厲子臣之義爾

周太夫人傳

蓋自芸瓜負米親承黃玉之書泣筍號松特紀紫金之  
管孝之為德豈不重乎然手不驅蚊憫濮陽之忍痛聲  
能感鶴聞處默之銜哀厥事可風其人足敬似中郎之

侍疾七旬無暇於求衣若申屠之慕親十載何心以御  
肉惟吾式燕實無愧焉因其孝而遂得其慈感其子而  
并傳其母此周太夫人之所以傳也太夫人系出周宗  
產于真邑伯仁雅量代著汝南公瑾名家世推江左靈  
儲嫠宿地當躍鯉之津教本國風詩咏鳴鳩之渚生而  
守禮志不事夫庸人幼即知書名有同于博士時無逸  
公炊方夢白彈用續膠石氏入門九族咸知見重少君  
歸里三黨由以加親兒鮮衣蘆寧識柳公權之為異出

姬多纍葛豈有周太姥而無是言于是方進懷恩為耽  
書冊高柔見愛益篤瑟瑟而太夫人富不為驕貴而能  
下衣無火浣曳大練而猶華釵少明璣選中璫而獨恕  
至于宮修采藻日以未逮為悲野飯翳桑時以不周是  
患先河義重捐多金而祠構翬飛待渡堪傷出餘資而  
橋橫鴈齒感遺言而嫁鶯誼重夭桃見枯骨以脫驂恩  
敷廣柳則助義無妨于典珥施仁不恡于抽簪是以海  
內徧乎休聲域中稱為隱德公之得此多內助焉迨乎



日出當心海填無力鳳亡其匹誰憐宛頸中宵鶴有其  
雛未可捐軀長夜付冢兒以筦鑰不戾三從撫兩稚于  
提攜何慙再起豈知麻姑轉盼俄見塵揚遂至漆女傷  
懷果聞天墜救無披髮爭操室內之戈禍在剝膚莫厝  
突邊之火伯之隕矣歎大厦之將傾予何歸乎悵危巢  
而已覆鄉闕播越八百里處處驚蜀道之難親戚凋傷  
三十年人人利齊奴所有太夫人聞雷不震涉險如夷  
動者持之以靜中流之砥柱常安急者應之以閒當局

之機關獨妙紛紜自解若芒刃之斬亂絲神色無驚似  
輕裘而臨大敵卒能潛消衆變默劑羣情全破卵於湯  
火之中出覆舟於波濤之外堂前畫荻總是淚痕燈下  
丸參無非苦味慰之以義命何殊身自教兒束之以詩  
書不謂母能無父六婚孤女頻年不倦傾筭獨撫遺孫  
晝日還為授讀念世難何辭身瘁顧吾力之已殫謂陰  
德有似耳鳴信其宗之必大訓兼文武劉殷之七業俱  
興教備慈嚴泰嫺之一門無忝仲以文章啟事行登鷺

序之班季以黷術致身亦入鷹揚之選歲當癸丑月在  
仲春嗟二豎之弗臧痛九原之忽渺昇妻歸月徒聞搗  
藥之宮織女還星但有支機之石當乘鸞而欲逝一心  
惟念前人迨化鶴而難留片語不關他務賢哉此母允  
為巾幗之難貽厥後昆是作閨闈之範爰述其事是為  
之傳

豐南內史曰世風不競人紀罕修士在恒居爭誇奇節  
時當變亂輒易素心震雷有虩虩之傷樊圃著瞿瞿之

刺而茲終養以和獨全其大存栢舟之雅操貽桑土之  
遠謨詩曰淑人君子其儀一兮母有之矣彼喪也  
以貽羞循墻而失步者亦烏足道哉

紅鵝生小傳

高士橋西是孝尼之故第讓王祠側為彥博之名園槐  
柳交陰蟬聲一卷松篁遞響鳥語四時益其間有紅鵝  
生焉生夙負英姿早懷壯畧緣奉鯉趨之訓遂忘鯤化  
之圖陶元亮之家兒罕求聞達王孺仲之嗣子不事聲

華用孝全貞固其所也于是覃懷六籍極力四聲得北苑之精傳旋為閣筆有西崑之麗句特妙題籤襲古錦以為囊篇裁芍藥鏤青瑤而作管手沆薔薇金粟重來蘇舜欽之遙追太白玉蕭新製姜堯章之低唱小紅歡既以古而深賞復因奇而富錙于古器辨乎周禮之文威斗遺模證以漢臺之記王將軍之庫內若具五材李公子之筵中無非三代苟其堂中賭茗不妨貴賈徐熙若至袖裏懷珍必至狂呼米芾矣而且尊同北海惟醉

詞人坐擬西園徧辭執客杜司勳解官之後始訂忘形  
嵇中散僵卧之餘還為納契雖牡丹香發長思功父之  
家而脩竹清風不減元卿之徑至若酒旗歌扇時迎桃  
葉船頭側帽輕衫獨往梅花閣上遇方山者謂為豪士  
望陶峴者有若神仙而弔古殊多問天還切過埋劍之  
地悵君子之不存遊響塵之廊嘆美人而安在杜鵑月  
冷歡少于悲麋鹿春深今猶似昔凡經遊于蠟屐悉寄  
託乎彩毫文為生焉情使然也又或玉鈎斜畔惆悵飛

螢鐵甕江邊荒涼戰馬尋西陵之舊事兩峯未改煙雲  
訪南國之遺踪六代徒存花草莫不臨風釀酒對月興  
歌撫長劍以歎歎鼓哀箏而慷慨昔阮籍之登廣武時  
少英雄孔明之卧南陽人思管葛含悲吐曲觸緒言愁  
見之或訝為狂識者獨傷其志矣予與生遊同山澤好  
締林泉爰以闡其幽懷用待傳諸好事也而生架蓄瑤  
蟬恒多問字屢隨銀鹿頗解揮毫墨沼流成獨得瑯琊  
之秘黃庭換得長懷曇礪之高故自號紅鵝生云

吳母鄭太孺人雙節傳

蓋惟史官所載務闡幽光女子之行尤崇苦節若乃鬢  
髦矢志出百計以存孤截耳明貞守一身而濟蹇斯有  
裨于人紀咸宜表于家乘則鄭氏孺人為不可及矣粵  
考善濡叔祖具國士之英姿厥配汪氏太君有淑人之  
雅操而孺人同操箕帚屈奉巾箱雖絡秀本自士流而  
長懷門戶故康成實為名族而甘就衾裯自挽鹿車用  
佐良人之畫頻調燕瑟能和大婦之心縱閣異東西禮



則均于采藻即饁分前後而事總切于條桑鍾郝堪儀  
喜懷珠而並產齊梁非遠痛載寶之不還日出徒嗟天  
傾不補鞭長不及況在疚之筮筮巢破難完有未亡之  
藐藐他方遺橐齒既易于鯨吞同室操戈誕復垂于虎  
視况長男之先逝至嫡妣之繼亡烏失侶而長啼鸞抱  
雛而獨宿多方巧誘有懷欲動乎貞姬密逞凶謀不利  
將施于孺子時則績勤文伯龜手何辭燭滅徐吾誓心  
靡改畫歐家之荻總是淚痕九柳氏之參無非苦味雖

頻驚于風雨每自凜其冰霜調護維殷察神明之既定  
敦勉至再知志氣之有成爰出洗滌之微資加之脫珥  
助其桑蓬之壯志勉以將車遂能化犢為龍養雛成鶴  
重興舊業譬夏后之一成力奠顏基若周家之九鼎太  
孺人誠惟保子而仍保其子之子仲震公謀足貽孫而  
更貽其孫之孫使非一線之能留安得四通之累致傳  
之典冊可稱巾幗之程嬰矢在咏歌是謂閨房之李善  
矣迨至三傳以後復尋二姓之盟則我周嗣隱君亦有

滎陽佳配早稱櫛士出圭組之名門雅號針神具幃帟  
之淑行殫心進乳曾無叱狗之聲洗手嘗羹豈僅烹魚  
之事會伯也夫尊人之意暫出塗山至女兮感君子之  
行長悲湘水兵戈既塞鴻爪雪而難歸琴瑟無音鵲啼  
霜而弗偶而氏強為笑語每忍淚以承歡力謝言挑欲  
毀容而秉節恒依繡像雖閭闔而不窺自著綦巾即糜  
羹其未飽燈前顧影歷百千萬狀而未改丹忱鏡裏含  
悽凡五十三年而竟成白首事傳戚黨謂雙貞並出一

門慶篤宗枋幸二烈流芳兩代綺偶遊楚地獲友文孫  
前既屬其祖姑後亦為其丘嫂言而足信可風勵于後  
昆行實有徵用儀型于末俗爰抽兔管弗揣不文竚待  
龍章同期有耀

馬伯元先生暨元配周太夫人忠節合傳

蓋聞烈士效忠秉丹忱以弗二貞姬守義矢白首以靡  
他是以運值昇平勒景鐘以著績時當豐豫安幃幕以  
成家若乃勁草之遇驚飈人嗟板蕩抑或長松之逢寒

雪衆嘆風靡則國爾忘身獨甘勞瘁心堅勵節不慮漂  
搖乾健坤柔實相成以不朽臣忠婦順乃各致以長存  
心有異乎道惟一矣若伯元馬先生及周太夫人者則  
見之矣太夫人寶林世曹鏡水名宗裔出絳侯世有弓  
裘之望家原公瑾人傳圭組之華生有蘭標早奉班姑  
雅訓長多蕙性無慚鍾氏芳規奠鴈而配參軍莊而有  
禮挽鹿而歸司隸孝本于誠滿座賓朋酒漿不匱終年  
慰問筐筥無愆乃先生投筆從戎慷慨際時之志彎弓

破敵雅多靖亂之才一出而圖吾軍三遷而帥其衆璇  
樞拊髀遙聞貔虎之威瓊島銷魂盡懾鯨鯢之氣真將  
軍從天而下醜類豈有遺乎諸反側望風而歸南人不  
復叛矣鞠躬盡瘁食少有似乎武侯效力忘疲星隕遂  
同于宗澤維時天傾莫補日出當心未亡人欲相從于  
九京藐諸孤尚伶仃于萬里干戈阻絕難歸廣柳之魂  
山水崎嶇莫返維桑之骸而太夫人手瘖心碎淚以盡  
而血流晝晝夜思人屢危而天相身經九死竟完穀于

覆巢體備千辛乃歸魂于故壠况時當改玉既伏莽之  
未除而家且賣珠復牽蘿而無策凋零井邑每常嘆于  
呼庚勞攘舟車更多虞之旁午白頭二老將不免于饑  
寒黃口多兒正有需于教誨仰事之與俯育所賴伊誰  
外護之與內調其艱實甚太夫人手封馬鬣十指幾至  
不完力護鳳毛三餐亦為少進堦前畫荻總是淚痕燈  
下丸參無非苦味含冰茹蘖凡四十三年補漏醫瘡有  
百千萬狀既老而不懈雖病亦不言是謂竭婦之功而

復代夫以為子遂能備母之教抑且無父以為師所以  
懿訓維章六龍爭為奮甲徽音彌著一鶚于以騰霄澤  
及兩邦并有神明之譽恩覃萬姓益弘清白之儀以致  
天賜鸞書人欽鶴筭堂中紫綬拜義成之封堦下文軒  
賜建昌之號世之寵禮行及無窮天之報施寧復有艾  
夫婦以德勝而持戶更復多才女以貞名而立身實多  
苦節吾無間矣復何加哉迨及屬纊之時猶然伏枕而  
泣出篋金而修先墓傳遺令而置祀田斯豈庸輩所能



實為丈夫不及耳爰紀其事以告諸來

贊頌

練溪文虞江隱君像贊

蓮峰毓秀橙里孕靈繼考城之閎閱承宋代之簪纓早  
挺岐嶷之質幼多孝友之聲期文章以振譽念怙恃而  
傷情傳介子乃棄觚而歎端木賜則結駟以行其為人  
也本多才而多識其御事也亦必敬而必誠雀一中而  
知為俊傑鳳再卜而許以和鳴梁家之配既叶陶公之

業益興千萬里而不辭况瘁三十載而甫就經營齊人  
服仲連之義楚國知季布之稱有婦焉能相夫而教子  
惟髯也信邁羣而絕倫方嚴慈之克濟何凶閔之游嬰  
賴虎頭之妙翰存燕翼之芳型寫古心于古貌揚令德  
以令名將慶貽於奕葉昭百世而流馨者歟

江氏四世五節婦贊

蓋聞髣髴矢志播雅詠于柏舟截耳明心紀徽聲于竹  
簡然青陵臺上鵠不再鳴采縷窓前鴈難重繫島淑二

寡但傳武庫之文華義三貞僅見永初之記未有聚苦  
節于一門紹幽芳于四代如我歎之江氏者也江氏系  
分伯益胄衍文通家風素著于柴車世德聿光于芸閣  
乃星辰照耀固神貽忠厚之祥而霜霰漂搖亦天篤孝  
貞之氣誰云荼苦益顯蘭馨粵攷明初元稱成化始惟  
江夏倡大義于靡他繼有滎陽抱孤貞而弗二或三珠  
在握而彌傷宛頸之心或一綫僅延而益結齊眉之痛  
烏啼門外處處秋風鸞掩鏡中時時夜雨盼黃姑于天

上悼白首于人間斯固可匹美女箴貽馨婦誠者矣爾  
乃時當嘉靖復見貞姬系出宣文爰生懿質杜韡淑德  
早作繼于傅家荀采妙齡遽含悲于陰氏撫其異出皆  
有絮而無蘆逮及所生并種松而成樹望藁砧于山外  
五夜含辛泣絡緯于燈前六旬周甲亦云酷矣不足多  
乎若夫積慶將開閔凶存至天傾莫補日出當心則有  
方氏孺人者來從德里迨事嚴姑叱狗無聲偕鸞有志  
烏稱比翼寧呼婆餅之焦蟲取旱蝻不禁女衾之抱爰

擇賢媛以事君子遂得淑女而產俊人兒難識父幾同  
趙朔之孤妾以無夫自是韓憑之婦同磨笄而不可撫  
破鏡以相憐螺贏封泥或謂形之可似鴛鴦照水但在  
影之能雙豈必鬚眉乃稱嬰白長將血淚欲並英皇足  
笑褚公問黃羅襪而奚在堪同王女把白玉玦而不離  
是誠無愧于禮宗允足再傳于巨孝而應全翁性切哺  
烏誠通乳鵲燃龔明之頂朱袍遂以延年封五鈍之羹  
白髮因而愈疾是以路公求狀柳子題銘天旌兩節之

門人號衆芳之里濟陽之裔蓋至是而益昌矣雖然石  
窳貶封國有旌崇之典延鄉寵錫禮存湯沐之儀凡此  
貞姿僉宜顯賚乃素門寒族既以請乞為難而弱質頽  
齡又為格程所阻禮官莫詳其姓氏女史罕識其儀型  
遂使隴上芳姿但化相思之樹海中窮羽空填精衛之  
波湮沒良多可勝三歎爰是詳其淑行用以備夫曠聞  
贊曰

猗歟德門實多女士厥有黃媛守德弗二迨及于鄭益

為其難保持如綫母力克殫維宋之子既貞而慈黽勉  
鞠育備著令儀及方與萬泉清玉潔孝事君姑慶貽來  
哲凡茲五母懿教克彰弘宣聖善裨益綱常有泉匪清  
有石匪介凜凜貞操名光函蓋彼臣奸君彼子懟父尚  
聞此風寧無心忤我為作贊以告後人誰司彤史永揚  
德芬

家貞女汪氏贊

原名寶珠

予族孫炯然元聘汪氏者喬出平陽家原水界榮華累

世信席上之堪珍婉孌多姿愛掌中而不離少而陟屺  
早喪嚴君歲及撫塵惟依大父從蹇修之約盟久訂於  
豐溪就內舅而居身乃隨於繁水而年方三五尚未當  
笄地隔半千猶虛納幣炯兮命促方埋玉以興嗟女也  
心驚遂折釵而兆夢貞鸞未偶其何意于雙飛寡鵠長  
悲誓相從于九死情原未解乃有性而無情禮尚未成  
輒因心而作禮靡間粉字已辦還陰堂上白頭空憐賦  
衛每聞改聘即欲捐生絕粒投繯既痛其身之可惜毀



粧易服益信厥志之難移於是一燈夜績惟同阿母篝  
燈半鏡朝窺不想仙郎合鏡堦前割股嘆露禱之多誠  
榻下承顏念冰餐之獨苦匪朝伊夕力為扶持積日而  
年躬親請膳玉仍在璞寧知價值連城珠未離淵自可  
光還合浦當今

上庚申之歲週貞姬甲子之齡洵正氣足以感人致清風  
遂能變俗合四十五年之久以孝存貞使百千萬人之  
多因誠得動青衿繡服拜送於荻港之濱彩榜金書迎

返于柳干之舍墳前洒淚草木為枯室內藏形庭除不出夢中雖見猶然未識容顏地下相逢諒亦轉多悽楚迄今而又逾十稔久且未免於饑寒至此而益勵一心貧乃更堅于風雨未經作婦百年忍痛比殉烈而尤難若令為臣一旦顛危定效忠而弗二使當異代猶將遐慕斯人幸在吾家更得親觀竒事乃有忝為族黨置若罔知且聞獨擁膏腴棄而不顧斯則自棄倫常之外寧能復徼忠厚之貽某苔水陳人隋橋逋叟然少登史館

與聞風教所闢老返鄉閭喜見貞良尚在傷哉貧也未  
能請卹以

龍綸慕而書焉或可垂光於蠹簡為之贊曰

有美一人得氣之正金石之心冰霜其性性與時乖心  
難命任世處其艱力持于定白髮靡他青燈自映蟻羶  
弗慕蝸爭罔競宛頸終身秉懷益勁視彼纖夫百年朝  
菌塵息誰多榮名罕盡我作此贊弘昭貞佞用示後昆  
毋斃爾敬

茅士可天女散花圖贊

彼何人斯維摩居士而非維摩即維摩氏是二非一是一非二無法可記不可思議是花非花花落何際破除諸有行所無事人我不存空色非異不生不滅多生咸濟作如是觀如是如是

羅母葉孺人壽頌

吾鄉之有羅氏三君子也才堪鼎峙如瞻韋室之星品合珠聯並列王庭之樹而季子臨思尤與予常敷文酒

之好數為山澤之遊每歎何物寧馨得斯異質遂至今  
時淮海乃有俊人而前此十年獲為呂庭之叔夜曾為  
數語忝作魯國之奚斯始知泰岳出雲爰能致雨醴泉  
沛澤必有其源則壽母葉孺人者是矣太孺人懿德天  
成徽音日懋蘭常在谷以不植而偏芳李欲成蹊乃無  
言而更蔚雖顧愷之史未能紀其二三即劉向之篇何  
足言其萬一其為女也聞絃輒辨慧每歎于中郎借硯  
能修文可續于班令而姊姊推為婉孌保傅服其溫恭

則孝著于家此其始矣其為婦也挽鹿而歸提甕不辭  
其悴烹魚以進饋食靡懈其勤琴瑟無噍殺之音機軸  
有箴規之益則敬存于室又其至矣至其與人也有禮  
有法佩璲時解于延賓何有何無方舟弗忘于恤患三  
黨無憂舉火百口乃可名橋以此為和可知矣若其  
守己也既明且哲保家於數載之前亦淑而貞持身有  
百年之恨將荼而若忘其苦畫荻而彌盡其心以此為  
節節靡加矣是以教成而業廣道在而名彰耳目固以


神明福祿深于日月今之距昔又十載焉太孺人之齡  
愈高三君子之名愈起而豐溪逸老愈見其昌看東閣  
之梅花猶存香雪挹北堂之萱草更見清風伏朱鳥之  
窻中聊窺阿母望丹虬于筵上復覩麻姑敢辭擘齒蓄  
之箋用以獻葡萄之醞駐顏有術寧須問三祝之舊文  
註錄堪期願且更九如之新製乃為之頌其辭曰

坤輿毓秀離曜垂芒月為陰德宿有婺光爰當北陸載  
降南陽諸梁衍派越國流芳惟茲淑媛用產瑤房玉伴

純粹珠比溫良聞詩漢殿習禮齊宮裳衣窈窕行珮從  
容在冰上語有林下風言歸君子作配名宗裔華夢鳥  
譽炳乘龍琴調司馬案舉梁鴻鳴機助讀劉薦留賓翁  
媪相賀娣姒維均乾餼罕怨鍾釜多恩薛家有鳳王氏  
咸珍訓惟以義教每由身養人以愛持節為貞辭多取  
寡戒逸甘勞恪安義命理謝紛曉能書百忍獨化羣囂  
禍因智免量以榮高行遵恕字吉取謙爰百年無爽介  
祉是徼鮐背矍鑠鶴髮婆娑含飴自樂強飯益多長膺



家慶永保天和孫枝蕃庶子姓駢羅蘭馨厥穎桂挺其  
柯百齡未艾千載奈何屠維屆歲應鐘發聲啟青紗帳  
駕丹轂駢宮開駐景臺築懷清赤霜繡帔紫電晨纓桑  
田笑指桃實歡呈永須介福長享遐齡



林蕙堂全集卷十一

欽定四庫全書

集部

林蕙堂全集卷十二

詳校官檢討臣劉錫五

助教臣常循覆勘

總校官編修臣王燕緒

校對官助教臣卜維吉

謄錄監生臣王宮

欽定四庫全書

林蕙堂全集卷十二

湖州府知府吳綺撰

文

祭四安石神文

維康熙七年月日知湖州府事中憲大夫某以牲醴之儀致祭於四安鎮水中石神曰惟神肇作人形不知所始託為神識未必無因徒竊日月之靈乃知江河之崇

而屢沉糧艦致耗國儲太守代帝宣威為民司命不難  
赫然震怒效趙昱以求蛟聊且告以精誠學昌黎之徒  
鯀念爾為妖于水次無非求食於人間特遣具儀用申  
明信爾其潛踪水府使舟楫以安瀾庶可奏績天倉免  
雷霆之霹石如其有識尚或無愆

葬凌忠介公告墓文

仰惟我公星岳降神清風獨立浩氣常存時為午未寇  
躡晉秦狂呼莫應義憤空陳傷哉不戢兵叩帝闕龍髯

洒血麟趾蒙塵天驚海湧雷走星奔家存靡國君喪何  
臣公時慟哭宛頸而死書報慈親訓貽幼子平原握爪  
睢陽嚼齒魂繞皇畿骸歸故里瘞玉無緣帑金空賜榛  
莽一棺星霜二紀庶吏難為忠臣不祀嗟彼殘賊崇墉  
特起我來公郡拜公道旁公子葛帔夫人練裳見者隕  
涕我心用傷爰謀窀穸此地實良佳城永固碧血用藏  
西臺有淚北斗無漿日月浮雲山河夕陽公其披髮問  
彼太倉

太白亭落成告孫山人文

憶予童歲見先大人一編手把朝哦夕呻拜而展視曰  
君詩文疑仙疑俠不予不孫豈余今來拜君之墓遺土  
一坏淒涼道左草白霜枯葉黃風墮山空無人掛瓢何  
所爰感予懷特為君葺白石為門青松作室建亭翼然  
在墓之側有春有秋可遊可息聿成先志以待後賢喬  
松漢代桃花晉年瀝酒一觴頌詩一篇赤城霞起君兮  
在焉

黔縣啓聖祠上梁文

伏以人倫明于亘古而先產治人之人聖道揭于中天  
而早生毓聖之聖自尼山應禱主教兼主治之權而泗  
水却流作師代作君之統蒼鱗繞紱三千子賴以提撕  
赤雀銜書數萬載因而振攝然先河而後海星宿出自  
本源而立地以觀天覆載難忘奠麗匪父匪母萬年開  
長發之祥為公為王歷代修獨崇之典况茲北野之古  
邑實為南國之巖封四山圍列以環溪兩水交流而若

績人文世顯邑多飛蓋之英地氣隆崇里有鳴珂之彥  
然夫子之宮數仞既無類于杏林乃聖父之室三楹尚  
未安于芹水荆榛偏處難為多士之瞻椽桷傾頽莫慰  
聖人之孝况一行抱器猶存元子冠裳三命循墻獨備  
上卿彝鼎委禽實原從父遂毓秀于昌平乃虎久著備  
闕且建稱于鄒縣功德實有所自典禮豈可缺然哉維  
我族孫實當秉鐸爰請各憲特建崇墉舍其舊而新是  
圖謀于眾而獨為任翬飛鳥革煥然闕里之規模龜伏



麟遊宛若淄壇之氣象右當聖殿金聲玉振而同賡左  
傍倫堂夏誦春絃而不輟前臨重嶺四時之嵐氣長來  
後繞清洋一派之澄波若帶香生曲沼如傳蓉鏡之芳  
山對梓潼似映桂宮之讖斯又仰協于地靈而下徵于  
人事者也若問寢若視膳文親之晏夕長安或鐘鼓或  
几筵宣聖之神遊較近凡同景德悉聽徵歌

拋梁東霞燦扶桑曙景紅一自朱甍開勝地佇看石照  
起淵龍 拋梁南一道清流繞翠嵐此日檣星添碧瓦

上林春信又重探畫拋梁西梁安畫棟與雲齋瑞氣好  
看增勝域名賢結隊陟丹梯 拋梁北劍氣筆花爭吐  
色驚傳赤電繞城居海市樓臺勝充國 拋梁上虹霓  
直吐三千丈曲江駿馬或爭馳染將柳汁宮袍上 拋  
梁下明珠寶玉皆無價銀袍都帶玉爐香他年好把瀛

洲

伏願上梁之後奎光遙映斗宿聯輝周道常平名士弘  
興于東序唐文初變有人得繼乎左臺少聖之謨濟濟

進皇家之俊從公于邁藹藹多王國之楨席墜三鱣先生自此升矣榜開五鳳學者得無意乎

碑

安豐場華周二王神廟碑

蓋聞祀先利物有功與德者斯崇祠重維風惟忠與孝者弗遺故誠存一念而英爽亘乎累朝道濟當時而利益昭于百代均國典所必重而民俗之由隆也安豐為宿莽之區歷代鮮薦蘋之宇而華王之有廟也則鄭君

所創始焉王世本譙人生當漢季少工經術本有志于  
扶傾兼善方書乃多端以療疾辭徵辟而不就品具高  
風視分劑以無差心存妙解湔腸剖腹一九時下蛇蟲  
養性除疴五戲常兼熊鹿神奇罕測具存陳壽之編羅  
網無端遂及魏武之難雖書焚獄戶悵丹笈之弗傳而  
散授神樓服青粘而多驗在昔魏晉之際得門人吳普  
懷師誼而始祀于蕪城近今慶厯之間有土民王某感  
神麻而別祠于淘境方家瞻仰咸奉醴以告虔庶姓祈

求得刑牲而薦社但附庸金地初則俎豆之不專而錯處塵衢繼又垣墉之未廣民之聽也神其吐之鄭君系出康成由來樂善人如龐蘊本自好施乃因邁疾之獲痊仰蒙神佑遂欲崇祠以修祀爰與衆謀公同善之懷錢百緡而未足鼓當仁之勇鐘萬杵而不辭闢地開基手除荆棘庀材作室肩荷梓桐遂得鳥革翬飛告神工之克就龍章鳳質慶廟貌以維新夫上扁鵲之陵土能愈疾入神農之谷草可除疴而况蘋藻之勤修時無廢

事必有威靈之顯應仰藉宏庥矣又以里有周王世為  
宋之孝子夢徵龍育少秉靈姿性切烏傷早多懿行奉  
慈言而遠涉將祈福于安溪聞凶訃以長號竟殞身于  
衢道孔聖公感之而挽救胡舟子奉之以貨船翊應正  
烈之封著于前代雨暘疾疫之禱顯于累朝特為傳寫  
詣厥故鄉備列威儀肖諸前殿昔郭公侍膳尚且山號  
孝堂考叔懷羹猶復祠稱純孝况斷腸以痛母致畢命  
以從親用勸敦倫良堪化俗呼圖勒之鼎故廟此其宜

哉狄仁傑之毀淫祠吾知免已然合其前後已昭神聖  
之規模而計及久長必藉僧人以守護爰招緇侶更啟  
法堂鹿苑東開麗雲霞于金榜鷄園左闢啟日月于銀  
繩舍敞赤華月滿恒瞻瑞像房開紫柰清風不雜凡香  
室是維摩問法堪橫師子筵修圓覺聽經常到雉兒拈  
座上之花徑裏三千蒼葛製山中之漏池邊十二芙蓉  
固已四衆燈香方便眠魚之席兼之三餐粥飯現成養  
鶴之田不必投齋更向洛陽寺裏毋煩乞食常居舍衛

城中此則共賴佛光將以永邀神慶以斯濟世可衛國  
而庇民以斯寧人可厚生而正德君之致力可謂勤矣  
君之用心可謂密矣建袁雙廟當必顯驅虎之靈作頭  
陀碑實有媿雕龍之彩爾

曲阜顏氏家廟忠孝碑

蓋惟運由五德以相嬗不替聖賢之裔位以千年而得  
正聿昌忠孝之宗然日照月臨正氣咸資于神誕而山  
輝澤媚清風罕見于家傳緬想斯人盱衡當代則河間



太守顏公父子其人也公家原復聖胄雖古而愈華代  
有名流文在茲而未絕與聞正學居七十二子之先獨  
受遺經在六十五傳之後拳如魯國方總角而偏竒舌  
似常山每讀書而知慕金門射策廣川具繁露之才玉  
殿揮毫曲水羨凌雲之氣初膺大邑隨車即種甘棠屢  
典名封迎刃俱成偃草雷霆在手歷盤錯而無傷冰雪  
為心處膏脂而不潤路留遺錦民當綿竹以無欺道見  
縫裳賊過朝歌而必獲而薛宣強項不拜督郵賈誼拊

膺恥同絳灌是以舉旆闕下曾明大令之寃題字屏中  
獨重神君之績非長孺而不可俾治股肱使希烈而何  
辭寧塗肝膽茲則星精欲殞天步將移甲仗連營中山  
無可完之壘鼓聲動地瀛海鮮不沸之波鼠盡空城尚  
扶病而煮鎧雉傾殘堞猶賈勇以登陴國事將危遂置  
身謀于不問人倫自識豈云天道之無知毒甚燎原總  
是丹心自執慘聞闔室惟餘碧血難灰而長君孝靖先  
生清宵妖夢早徵易簣之不祥遠道飛書空歎單車之

莫挽望雲已隔心驚兩地傳烽乘霧維遙益痛孤城受  
矢粉身靡惜揮愛弟于壕邊折足成傷遇遊兵于道上  
如林戈戟書生慷慨而直前若畫鬚眉戎帥仰瞻而加  
敬似秦廷之痛哭血是淚痕若荀氏之長號喉應氣哽  
婦被割而罔恤徒感心香兒既病而難支誰憐弱骨叢  
披荆棘窮晝夜以跣行路塞豺狼望山川而袒泣躡天  
踴地得殘骸于焦土之餘斂死全生拾完卵于破巢之  
內遂使持名元老嘉歎以為罕能雪涕旅人傳聞謂之

奇事乃先生力窮匍匐負廣柳以歸田意絕揣摩守寒  
蓬而閉戶傷哉仲也痛天序之中零念此季兮勉月征  
而益篤哀銜朱雀類劉悛不過南航誠感白鳥似王裒  
曾無北坐停雲朗詠彈宗子之一琴過日清吟擁藪侯  
之千卷帶經隴上將畝畝以終焉柱笏山前謝功名而  
已矣道旁守劍鄉里傳王烈之風井畔分泉父老感管  
寧之化齡逾周甲慨猿鶴之空存歲值逢辰歎龍蛇之  
遇厄闡幽光于聖代雖傳褒德之封振清議于禮官尚

乏易名之典河汾澄學門人竊號為文中彭澤高風國  
史允傳乎靖節謚曰孝靖禮不然歟嗟乎柴市歸魂非  
有勸忠之子睢陽嚼齒曾無併命之兒茲則墓號忠貞  
可一門而含笑澤流文史比萬石而何慚賢者能世其  
家君子克昌厥後六龍夾日李供奉或是謫仙雙鵲摩  
雲杜司勳豈非才子某論交有素景行無私題郭泰之  
碑斯為不愧作秀實之傳此必可傳爰刻貞珉用書前  
烈永存家廟以告後人

歙縣西溪南仁德社廟碑

原夫崇卑既位兩儀垂育物之仁廣大無私四序有報  
功之典蓋高曷降澤即委職於黃輿而庶彙敷榮必托  
根于赤甸茫茫下土爰存牝馬之文膺膺周原用篤勾  
龍之祀菁茅分其五色圭璧用以式靈俎豆徧及萬方  
琮璜因而薦嘏軒皇立制創始春秋嬴帝宜年行兼伏  
臘與厲山而並重禾黍設於周京借蜡日以俱隆枌榆  
傳之漢代苟其三辰弗替必以勸農是則五戊咸遵因

而祈穀者矣矧余故國實號名封聚黃山白岳之靈具  
丹竈砂泉之勝都稱天子山川應牛斗之輝里產大元  
井邑衍龍章之繡家傳隆古風俗本自讓王世際雍和  
禮樂觀乎季子左臺公登朝珥筆文章自作一家壘塘  
君卜地成廬忠厚相延百世人才子豈惟孝綽一門  
代有英流何數弘農四葉然荀為令族而里獨著於西  
豪裴屬蕃宗而居共推夫中眷非藉庶于靈主寧易致  
於康功也哉粵考大典於吾鄉原奉正神而有社靈分

歛上秀擷豐溪聚山水之幽竒當田疇之沃衍名威有  
赫已將及于千百年福蔭維多幾漸踰于三十世田歌  
幽鼓祭賽無曠于鷄豚婦饁夫耘昭報不煩于貓虎春  
而風夏而雨若或憑之趨之吉避之凶吾無間矣至於  
宜男燈火屢應蘭徵祈女香煙曾分樾庇龍文密應未  
殊洛水之祥鴨脚重生自比上林之兆故由今溯古雖  
幾歷夫廢興而自公及私曾無裒于胥蠻何其歲時既  
久乃至梁木將頽廟貌長崇其何侵於草莽靈功欲壞



寧無恫於几筵爰有倡首者汝漸周裔啟芝翰京等諸  
君弗吝捐金而就義因而應事者宜脩啓龍其旋咸為  
庀木以宣勞百堵咸興競奏登登之響兩堦克敬欣觀  
穰穰之規當康熙平治之時值癸亥豐亨之歲由已而  
戍計功之成也僅六閱月維士與農樂神之安者有千  
餘家既鳥革而翬飛亦禽恬而獸息於是恒占高廩屢  
報神倉四鄰結宗會之歡萬井篤蕃釐之慶將見陳孺  
子之為宰天下維均豈必張司錄之當官府中不入而

已哉夫周之言禮傳帔舞之文魏之作歌記方壇之制  
茲考於古不既協歟綺也浮沉乎寒暑陰陽流浪乎東  
西南北未能乞一日之醉遠效山翁時復作千里之吟  
悲同越客割黃羊以賽福固所望乎得白鼠以銜又非  
所冀也聊應宗人之請敬告後昆殊愧往哲之詞弘昭  
茂祉嗚呼過威惠之廟者寇亦避其風雷謁豐澤之祠  
者人尚邀其雨露爾

方大家新築堤橋碑

蓋聞興廢之有關其地者則詳其始末以告諸來功德之可及于入者則紀其物力以傳諸後良用昭其匪易將以示夫毋忘也予家自唐代遷居以來歷年八百餘載由始祖卜地之後得世三十餘傳在歙邑之西櫛比而處跨豐溪之上聚族而居溪滙豐樂衆水之流更為環繞堤當天馬諸山所注遂有崩衝廬舍每為不寧井里因而多患曩有節母程太君出其組紉所積訓其孝子介石公倡為畚鍤之謀特建新橋益加修埂千峯揖

翠桑柘不減於秦人萬樹浮陰桃柳幾同於西子乃歲月既久遂阻塞其北隅而齒蝕維多致奔衝于南道馮吳慘酷莫可勝言黎庶災傷難以盡述而明自淑配方氏大家聞而動心遂為勉力斂簪珥之費重戒糶糴減鹽米之餐還謀土石補其疎而密亦固聽鼙鼓以相聞因其舊而新是圖屬畚鋤而不倦千夫雲集如趨龍首之渠百堵雷殷并運魚鱗之甃始於已迄於未凡胼胝者三年肇於北達于南作堤防者數里由是狂瀾獲砥

耕作遂其安恬即或暴漲驚流隄岸無憂潰決是役也

旱澇得以啟閉而

闕

不舛望于一犁也屏障特

為藩籬而沉竈產蛙不罹災於三板矣洪潦弗淪于馬  
鬣而壘壘者無夜哭之魂飛流不斷乎羊腸而貿貿者  
無途窮之泣一舉而功收乎四善一日而利濟於千年  
不其休歟是可傳也况芍陂之績勗自偉人蒲坂之工  
由于傑士而茲方媛本屬女流柔比少君入室祇能挽  
鹿孝同龐婦登堂惟解烹魚乃柏舟既勵其貞操而萱

寢更高于義舉前有功而莫繼後何以傳乎內有美而不彰外無以勸矣予曾叨逸史復忝宗人敢謝不文自乏珊瑚之架遂忘厥事用留琬琰之鐫爰樹以碑為之  
銘曰

隄之下其水湯湯隄之上其衆穰穰六轡載馳兩車用將暎有以溉漑有以防維耦十千食我農忙維此碩人厥世曰方俾我後昆于斯堤也同貽慶于無疆

重修梁醴陵侯文通江公墓碑

蓋聞事有異同志氣感平生而自動時無今古文章歷  
曠代而相知爰覽遺編尚懷前哲則醴陵侯江公其人  
也公以彩筆知名金貂應識賦詩沮逆屢抑雄藩建議  
匡時預知強敵絳衣獨立朝綱弘振于南司皂帽先歸  
物望特孚于北海言其風采既振一時相彼天章允符  
五色斯固足以鳳觀昭代虎視累朝者矣爾乃建平之  
際不無械繫之虞昇明以還屢邁鼎移之痛運逢天監  
爵拜醴陵還思素宦之懷遂為行樂之論豈其才之果

盡也抑其遇有難言耶夫士在當時名垂後禩才華既難以自抑運會又欲以巧逢天實為之庸可易得哉公墓至今千有餘載田桑屢變不隨絳水浮沉隴樹空存尚有秋風蕭瑟陵名下馬已無酌酒之人祠歎瞻烏絕少題碑之客今則裔孫世棟來茲土而雅具永思適其凡倩程埶佐斯邦而頗多惠政爰陳祭祀採芳藻以登筵共效勤劬闢寒榛而開道遂使龍門更矗馬鬣重封康成玄塚奠者識為名儒供奉青山過而呼為才子因



俾立表以告後人用志斯文是貽來者嗚呼一坏殘土  
似染墨痕三月飛花疑分筆彩寒山寂寞夜臺知向誰  
家杯酒淒涼詞客還應識我為之銘曰

德水逶迤神嵩截竊肇誕鴻文允襄駿烈雲卷霞舒珠  
光玉潔安石夢雞莊休化蝶經千餘年歷十二葉大劫  
靡灰洪流弗啗世澤濺如孫謀詒厥思起悲風采從明  
月宿莽披霜荒榛斷雪鶴表重高龜言永協孝思無斁

視茲豐碣

鴛鴦墓碑

乙未秋仲言游雪溪有以野禽見餉者中得鴛鴦二隻  
義不忍食乃命童子瘞于峴山之陰明霞墓側亭以並  
蒂之花薦以連枝之果酌雙溪之水以酌之而為之碑  
曰維此匹鳥字曰文禽綠首紅衿紋翎繡臆朝朝宛頸  
生來未識相思處處俱飛夜去何嘗獨宿暫分蓼嶼不  
堪回顧頻頻才隔菱塘已聽相呼唼唼霍家池內睡酣  
舒夜之蓮韓氏墳前戲上合歡之樹遂使幽姬意動蕩

子心回效比翼以恒雙願同心而勿替豈身膏乎鳴鏑  
遂命盡于驚弦錦羽橫披尚帶情人之血朱絲斜綰難  
聯倩子之魂何可供我盤觴乃令試之刀俎于是瘞之  
重坎刻以貞珉無復濡于在梁聊以完其同穴若令寫  
之圖繪須登蘇蕙之機化作澄泥亦是秦皇之瓦

說

金液丹說

此丹本自異人傳于秘授珍同丹雪似神女之銀奩美

勝玄霜得仙家之玉杵不待虬脂滿合可徵愈疾之奇  
實則鸞血成丸頗著廣宗之妙試而輒效魯單豹因以  
駐顏用此無方李猶龍曾為益髓主人不敢自匿聊舒  
同善之懷諸公幸用相珍并得培元之力爾

誄文

許仲容先生誄

仲容許先生者予友念脩立臣師六之尊人也系本于  
將仍傳月旦人同叔重久擅風華而孝友本于性成仁

恕由于天授少而負笈盡窺東魯之藏長好披圖獨愛  
西銘之學誠通求董讓表推梨蔡中郎七旬何心解帶  
第五倫十起猶媿安眠指百口以名橋合三宗而待爨  
時逢認履不妨徒步而歸即遇盜菘翻欲奉身而避鄰  
家卧犢長待飲于管寧漁父獲龜得全生于毛寶焚券  
非闕于市義造車恒望以借人以故石氏佳兒皆能數  
馬荀家諸子并可名龍鄉黨化其清操途多守劍郡邑  
欽其碩德卷有式廬終身無汗玉枝晚歲獨摩銅狄方

欽定四庫全書

杜德望全集  
卷十二

其生也邦君脩几杖而乞言迨及溘焉鄰里見旌幢之  
入室名隱居于天上夫豈偶然迎柱國于生時吾無間  
矣綺交深孔李誼篤荀陳每獨拜于牀前嘗共趨于庭  
下恨當易簀之日匏繫一官欲希磨鏡之風芹懷五載  
茲值仲宣歸里始知靈運生天奉席無因題旌有自喬  
公墓畔寧忘腹痛之言郭泰碑邊應匪心慚之作誄曰  
猗歟者德偉矣令儀明珠比譽璞玉含姿橘懷陸績被  
共姜詩書題百忍臺號四知分餐有飫讓畔靡虧光風

被物膏雨濟時智高失馬仁渥縱麕庭齊珠樹坐長金  
芝制崇更老禮重耆頤玉棺天墜絳節霞披龍章待貴  
鶴駕難期青瑤永刻黃石專祠千秋是仰百代云思

鄭隱君誄

隱君諱

闕

字偉然歙人也少而岐嶷長為模楷閔子

騫之門內初無間言萬石君之庭中惟多雅節臨深履  
薄庸德而復謹庸言婉色怡聲養體而還能養志輕紈  
不御美好弗入于懷蔬食自甘淡泊欲明其志讀書而

惟求大義略似淵明居市而但本至誠爰師卜式是以  
好行其德靡倦于心焚阮裕之車嘗能市義毀馮驩之  
券匪以微恩而愛出物先施由親始似薛包之讓產恒  
問有無若孔奮之遺衣無分遠近事兄如父誼每篤于  
二難撫侄如兒情更殷于十起訓諸孤以詩禮開塾無  
異于鯉庭率羣從以儉勤傾囊用資乎馬磨分餐給廩  
憐女弟之孤貞贈葬資婚助貧宗之屢空崇几筵以報  
祖捐千金而庀梓材修俎豆以敬神擴百畝而施柰苑



竭股肱而罔惜在國如家推心腹而弗疑寧人負我於  
是積勞成疾痛霜露之不臧與物多憂悲日月之云邁  
猿鶴起高人之怨龍蛇為君子之灾淚洒重泉愴惻題  
碑之客魂歸故里淒涼執紼之人媿不成文爰為之誄  
其詞曰

蓮峯萃律練水淵渟爰多間氣用產竒英既孝而友亦  
廉而貞聲聞于國德邁于庭心乎何廣耳也若鳴潛修  
弗怠華譽迺盈彼蒼不弔厥算弗靈慶延五世愴結九

京

方隱君誄

之屏方隱君系由環嶺誕自石川世傳曾閔之風家在  
崔盧而後生而穎秀曾見探環幼即伶仃空傳與硯孝  
能求堇偏深令伯之情貧且棄觚遂有介子之嘆繫牛  
成訟幾致遭寃真雁求婚還驚非偶踉蹌歸里堪傷任  
氏之兒老大完姻始得孟家之女新嬀不辭夫提甕雅  
善烹魚夫子乃遂其牽車彌通結駟人皆赤手乃三徙

以居陶軍豈蒼頭忽一成而興夏漂搖風雨葺牖維艱  
起滅波濤停舟匪易而衛公子之居室不待苟完郭尚  
書之求瑩先期得吉畫哀盡禮翬飛首建於崇祠致愛  
致恭雁啄無分於別爨猶子吾子也第五倫之十起寧  
私是人非人乎陶靖節之一書常誠攘雞不怒翻成飲  
酒之歡失馬無憂不入忘機之慮難嘗欲急有纓冠而  
無閉戶之時事在必為多隼擊而少鷁飛之勢是以盜  
慚王烈人服管寧下澤停車咸叩頭而呼長者太丘行

縣爭舉目以看偉人薛鳳齊肩或聞詩而聞禮荀龍著  
膝亦教孝而教忠言有壺觴久入耆英之社動成規矩  
行登耄耄之年而驚鶴俄來龍蛇忽悼痛九原之不作  
卜五世其必昌唐寵遺賢用表方干之墓漢旌有道爰  
題郭泰之碑誄曰

練水鍾靈邗江著德屢躡而興當窮靡忒筭路維勤惟  
帝可式孝啟弘規厚傳遺澤德懋化鄉齡高杖國一笑  
凌雲重歸鮮日爰樹豐碑以傳懿則待彼龍章弘茲燕

翼

鮑母王孺人誄

鮑母王孺人蓋鮑君瑞生之母也宗出樹槐性成毓蕙  
幼擅睢鳩之德長歸挽鹿之家運值中微嘗親佐餽時  
方再造獨任鳴機孟德耀椎髻以前偕鸞有志桓少君  
提甕而出叱狗無聲帷裏篝燈識程朱于正學座中揮  
塵呼嵇阮為異人江鯉一雙自躍姜家之水靈雛五色  
長依薛氏之庭繪剪髮之圖寧存金釧換留賓之酒獨

解羅襦而鏡掩離鸞琴彈別鵠玉樹凋零早街悲于伯  
仲金戈搶攘遂竄跡以喪亡看敬亭之山徒憐飛鳥望  
揚州之月誰止羶羊乃季也賢哉母兮天只赤眉初定  
即為扶杖之時白首言歸不廢停機之教為門戶計朱  
公寧穢于累金存忠孝心定遠豈嫌于擲筆秋風錦袖  
猶慮蛩吟春日板輿頻傳燕喜含飴玉砌玩蘭蕊以婆  
娑介酒瑤堂慶萱花之婀娜東華益算孝子方切于祈  
天南嶽歸靈仙娥遽迎而返月乘鸞何處水隔三峯來

鶴無期雲迷四極嗚呼斑與不降慨方朔之心勞畫扇  
空存憫王修之骨立青鏤一束殊慚陸子之文彤管千  
秋自有劉生之傳誄曰

西池降德東海修儀風清玉案月靜金徽儉傳曳練勤  
著支機白眉克紹黃髮是宜人方恤緯天不慙遺班留  
婦訓曹失母師迺昌厥胤允顯于時誰箴女史此無佞  
辭

史蕉飲故妻李珠僊誄

維康熙二十四年九月十八日李賢媛卒于家春秋十  
有九此吾友史子蕉飲之元配也媛姓李氏名正芳字  
珠僊家原姑射冰雪本得于神人系出晉陽星宿實根  
於帝子二分月下前生雅合吹簫七夕橋邊弱歲先知  
織錦不作庸人之婦願事伯鸞得為才子之妻爰歸司  
馬未諳姑性先洗手以調羹獨解郎情遂同心而綰髻  
河梁匹鳥能從枕上論詩京兆雙蛾每向鏡中得畫彈  
琴而窺春鬢蟬影弄其輕風把卷而看晨粧蝦鬚明夫



旭日擘篝燈之紙坐對揮毫抽插架之籤笑看潑茗焚  
香浴硯紅窓之韵事偏多脫珥收書畫閣之良朋獨好  
於是常為交頸小亦比肩繡佛像前並下三生之拜玉  
兒歛後私為五夜之盟慧以情生慧多而情愈密才由  
德發德厚而才愈藏然而雜座爭喧斂袂偏能不語捲  
簾深坐窺窓每若無人咏絮原工篋內曾無完藁調絲  
最慣壁間常挂餘塵婦信難為頻拭低頭之淚郎能善  
事寧痊有恨之疴遂使續命無絲招魂有紙愁如落葉

竟同落葉飄愁瘦比黃花不共黃花耐瘦淒淒斷雁影  
寒五夜之霜寂寂哀蟬淚冷三秋之雨非花非霧訪仙  
島其誰能為雨為雲除巫山而不是懽無一載况多離  
別之時合未逾年半是呻吟之夜嫦娥奔月竊妙藥以  
無歸嫫女還星隱神光而難合心傷別鶴空懷同穴之  
情氣盡啼鴉但灑呼天之血縷金裙褶莫尋斷夢於稠  
桑渲粉綃圖惟憶芳姿于穠李綠斯多感聊以述哀誄

曰

哀此碩人生多逸性體若珠明姿如玉映既溫而恭亦  
慧而靜詩自宋傳禮由班訓及爾采繁迨茲流行挽鮑  
宣車贈秦嘉鏡鴛盟非緣鸞叱寶命香與蕙消影同梅  
盡悼感孫荆哀生奉倩劍合何時環悲靡罄

墓表

有明御史仲淵何公墓表

何公仲淵名弘仁越之山陰人後陶介山僧大猥號曇  
約者即公也家本稽山具大元之仙客世稱學海抱子

朗之異才獻書即擢賢科射策而登高第初製桐川之  
錦雨輒隨車再彈梧水之琴花仍滿縣始則城脩百雉  
崇羅令之墉繼亦岸刻三犀築賈侯之堰更在冰而民  
在鏡清不容知冬有日而春有風和能得愛隴間聽訟  
頻栽召伯之棠山上題碑並長萊公之竹是以蝗投隣  
境鬼遁殊方邳邑祠韓或陳觴而致醉館陶爭魏皆投  
牒以請留既而鹿走秦原馬浮晉渡痛靖康之失守急  
用謹言值建武之紛更爰求勁節于是栖烏之府非正

士而不居避馬之臺惟嘉猷以入告任伯雨半載而一  
百八疏悉中機宜田表聖一時而七十二封未經採納  
囊矢終難于告廟投鞭還至于斷流舟覆厓山問趙孤  
而莫在途窮蜀道持漢節以安歸永夜狂呼血洒伶仃  
之淚顛崖直墜命捐辛苦之軀而心不忘君縱百傷而  
未絕魂猶戀國雖九死而還生勉從父老之言暫易浮  
屠之服駱丞驚竄曾來靈隱寺中潘閬潛奔竟出延秋  
門外朝朝痛哭溪邊碎讀離騷處處哀吟井內獨存心

史伊蒲強飯寧知周粟堪飧藉草無眠直恨蝸天不旦  
高人有陶靖節來或相從處士惟杜景賢知而不問萬  
山晝伏時共猿號一旦西歸遂成蟬蛻而遺書在篋不  
及妻拏露寢無棺難忘君父楊王孫之裸體自有深心  
史子魚之陳屍終完苦節嗚呼作雪菴之偈松陽無讓  
菊陽讀文山之歌信國何如魯國望西山而莫見蹈東  
海而不歸時有斯人可廉頑而立懦公之令子况脩行  
以成名忠孝能世其家今古罕渝其志是可表也豈不

悲哉

原任麗水縣令田公墓表

田先生名緒字衍文魯之德州人也望貴營丘身隆  
介嶽漢廷題柱世傳京兆才名宋室獻書人有祥符直  
諫荆華獨茂槐本相承曾祖奏賦南宮鳴鶴振一臺之  
響祖父傳經西序雕龍敷兩代之華先生貧號書農學  
推經聖雪高洛下羣來正叔之門霧合華陰並集公超  
之市爰稱之曰夫子是不媿于人師迨及

世祖之九年始對

大廷之三策牽綵入仕遂得縉雲製錦當官嘗多膏雨然而山高擇木夙為伏莽之區嶺遶蓮花自屬成叢之路鮒以穿而易漏蟻能射而難稽先生按籍如神持衡不爽燃犀獨照字莫溷于刁丁害馬先除案無憂乎旁午斯則振衣得領吏相戒以難欺發刃維劓鬼亦驚而欲遁者矣爾乃堰當西郭水滙東甌分四十八支之流溉百千萬畝之地歲在久遠日就污萊先生鑿龍首之渠



力為修復築魚鱗之壘手自灌輸比義欣之開芍波曾  
無重費若番系之引蒲澤倍有成功斯又利及乎千年  
德流于萬井也若夫整琴筓于板蕩葺齋序于榛蕪俾  
鄴侯之規制重興而鱣飛于壁水逮文公之英華不墜  
而鸞舞於醴泉比屋聞歌春有絃而夏有羽盈郊起頌  
民在鏡而胥在冰不三月而政成將期年以課最而玉  
棺忽墜寶鳥難飛朱邑祠前竟有招魂之客羊公碑下  
還聞墮淚之人萊竹空生望神君兮不再名棠勿剪無

慈父以誰依嗚呼一犢長留史冊永傳乎遺愛二龍并  
御家乘懋顯其義方伯也南國文章海內奉大蘇之學  
仲則東京制誥宮中知小宋之名天道豈盡難知吏治  
良堪弗朽宜昭茂績刻以貞珉用啟後賢紹茲芳軌

墓志銘

吳隱君仁先公墓志銘

公諱

闕

字仁先歙之豐溪里人也延陵公子登車開

禮樂之傳左臺大夫珥筆肇文章之體門高畫棨代有

名賢室富青箱時生碩士公幼而朗潤長益權竒慕相  
如之為人倣少游而處世早懷大志具國士之楷模多  
負豪情耻小儒之章句傅介子棄觚而歎燕雀安知端  
木賜結駟以遊鳧鴻無爽痛家聲之中落擬振前謨慨  
世緒之孤存何辭遠道過會稽而探禹穴悵金簡之靡  
存由吳苑以返蜀岡謂寶泉之可致四通得地朱公因  
以移家億中多謀管子何妨問業貪廉互用取與務當  
乎人心盈縮相權進退每觀之天道飛霜暑路曾幾何

時鑿井山泉已成無筭然而性成個儻意在流連讀計  
然之書非圖擁利善海山之策豈謂居竒百口為橋始  
成吾志三宗舉燹不待人求憫孤女之未婚頻為嫁鶩  
悼遺嬰之不育時復抱雛薛邑多逋屢毀馮驩之券隣  
人不惜嘗焚阮裕之車榭計千頭恩施廣柳糜舖萬戶  
惠起翳桑脫尼父之駢聊資累土贈曼卿之麥不憚空  
舟他如完破鏡于樂昌舞鸞重配返亡珠于合浦墜雀  
還生而且橫水編橋非惟濟蟻因山植樹常為放麕排

難聊城魯仲連何辭射矢持喪洛邑原孝先豈待駕車  
雖白玉四環烏足酬其陰德即綵毫千管未可罄其惠  
心斯可謂有濟于時好行其德者矣爾乃喜懼不形于  
色得失靡介其衷樹下息陰時為鄉人而飲犢竹中傷  
指不驚隣父之盜崧叔度汪洋陂澤莫窺其際季方仁  
恕閭閻咸化其風得季布之言黃金非重服仁軌之行  
白璧無疵當其好義樂施妻子挽回而不可及乎財亡  
產落交親譏訕而益豪常鄙齊奴散之不早還憐龐叟

去此何遲是以萬竈歸誠一鄉載德雖龍蛇在歲占為  
君子之灾而魚鳥懷恩爰動行人之慟羊叔子碑曾洒  
淚匪在襄陽董仲舒陵可奠漿長聞輦洛望鶴歸于千  
歲逢青眼以無期見馬嗣之五常羨白眉而有立高原  
是卜遺蛻用藏魂無所而不之何必阡名原氏德有貽  
而必報應知兆在楊家銘曰

靈壤環互佳氣鬱葱牛眠用協馬鬣是崇惟我哲士爰  
有陰功天賜其吉地運以隆丹崖霞起碧樹雲封千秋

永利閱此幽宮


瘞蘭銘

姬楚人姓馬氏蘭吹其小字也玉臺在郡家鄰行雨之鄉絳帳為村身是扶風之後李絡秀本出名門梁綠珠纔當弱歲言歸于我用遂其家時予方苦于茹荼而彼早安于集蓼長隨滌器不教怨起白頭每共彈琴獨愛聲調素指謂夫子豈長貧賤知長公不合時宜迨乎獻賦金臺簪毫粉署栖同鷄樹索米十年官似馬曹懷冰

一紀嗟東方之割肉雖不飽于細君憐西閣之同心貴  
長隨于大婦三更擁髻琪通德恒伴伶玄五岳儋書隨  
清娛偏依馬史而苔華初盛蘭夢再徵徒以抱痛于乘  
鸞遂致傷心于化蝶成仙無藥空憐奔月之娥思婦有  
花難覓返魂之客黃昏細雨洒紅淚于犀簾滄海明珠  
念柔情于雁柱爰以年月俾其子歸厝于廣陵之西山  
嗚呼春風楊柳難尋隋煬之陵寒食棠梨尚祭朝雲之  
墓為之銘曰



吁嗟之子厥修孔孺窈窕蛾眉參差燕羽薪仰槐添屋  
牽蘿補美助琴瑟芳齊佩黼大運忽終修期用沮令子  
青雲美人黃土毖彼下泉以永終古



林蕙堂全集卷十二